



中國方志叢書 · 華北地方 · 第一〇〇號

據

民國宋撰卿，高景祺等纂編  
民國二十三年鉛印本

影印

河南省

# 淮陽縣志

(二)

成文出版社  
印行

# 淮陽縣志卷之六

人物

龍門列傳七十志家仿之分傳人物陳自媯滿俶疆列孔牆者四人漢夷爲縣英賢碩彥歷載史乘自是以降曜顯宦敦至行難不苟免祿不苟就與夫鄉黨稱善風雅作人榛苓所在指不勝屈發前哲之幽光卽後進之表率缺誠有間徵無不舉并有名成一藝福錫百齡賢達鴻雪足資起興收善務廣例均登錄傳人物

列傳

周

陳胡公名滿虞舜裔也武王求得之封之陳以備三恪妻以元女大姬是爲陳建國之始

陳敬仲名完厲公子後因太子禦寇之難完奔齊桓公賢之欲以爲卿辭使爲公正後世遂家於齊爲齊陳氏

轅濤塗陳大夫齊侯召陵之役將還濤塗謂鄭申侯曰師出於陳鄭之間國必甚病



若出於東方觀兵於東夷循海而歸其可也申侯曰善濤塗以告齊侯許之申侯見齊侯曰師老矣若出於東方而遇敵懼不可用也若出陳鄭之間共其資糧靡屨其可也齊侯悅執濤塗叔孫戴伯會諸侯之師侵陳陳成歸濤塗

泄冶陳靈公時爲大夫靈公荒淫治以忠諫死

賈獲陳大夫鄭入陳陳侯扶其太子裨師奔墓遇獲載其母妻下之而授公車公曰舍而母辭曰不祥與其妻扶其母以奔墓亦免

逢滑陳大夫吳入楚而召陳侯懷公朝國人而問焉曰欲與楚者右欲與吳者左逢滑當公而進曰國之興也以福其亡也以禍今吳未有福楚未有禍楚未可棄吳未可從晉爲盟主盍託晉以辭楚懷公從之

顓孫師字子張孔子弟子爲人有容貌資質寬冲博接從容自務子貢曰美功不伐貴位不善不侮不佚不傲無告是顓孫師之行也唐贈陳伯宋封宛邱侯再封陳國公陸十哲位

巫馬施字子期孔子弟子孔子來游子期與子路薪於韞邱之下國之富人處師氏者脂車百乘觴於韞邱之上子路語子期曰使子無忘子之所知亦無進子之

所能得此富終身無復見夫子子爲之乎子期喟然仰天而嘆鬪然投鎌於地曰  
吾聞之夫子勇士不忘喪其元志士仁人不忘在溝壑子不知予歟意者其志歟  
子路慚負薪先歸嘗宰單父先是魯人宓子賤爲單父宰鳴琴而治子期繼之以  
星出以星入日夜不處而單父亦治子期問於子賤曰子鳴琴而單父治亦不見  
其勞何也子賤曰我任人子任力任人者逸任力者勞子期曰是施之未至也唐  
贈鄮伯宋封東阿侯祀文廟西廡

陳亢字子禽孔子弟子陳子車死於衛其妻與其家大夫謀以殉葬定而後亢至以  
告曰夫子疾莫養於下請以殉葬亢曰以殉葬非禮也雖然則彼疾當養者孰若  
妻與宰得已則吾欲已不得已則吾欲以二子者之爲之也遂弗殉唐贈潁伯宋

封南頓侯祀文廟東廡

按陳賢在春秋原區陳人之後太康縣發見有陳賢墓淮太接壤均舊陳封故此志與太康志兩存之

公良孺字子正孔子弟子賢而有勇孔子適衛路出於蒲會公孫氏以蒲叛衛而止  
之公良孺以私車五乘從孔子行喟然曰昔吾從夫子遇難於匡伐檀於宋今遇  
困于此命也夫吾與夫子再罹難寧鬥而死挺劍而合衆將與戰蒲人懼曰苟無  
適衛吾則出子乃盟孔子而出之東門孔子遂適衛唐贈東牟伯宋封牟平侯祀

文廟東廡

世碩七十子之弟子著書二十一篇名世子又作養書一篇以爲人性有善有惡舉人之善性養而致之則善長惡性養而致之則惡長如此則性各有陰陽善惡在所養焉宓子賤漆雕開公孫尼子之徒亦論性情與世子相出入云後崇祀鄉賢秦

孔鮒字子魚至聖九世孫魏相斌之子當祖龍肆虐懼遺典滅亡將家語論語尙書孝經藏於祖堂舊壁中隱居嵩山教授生徒所著書二十篇記先聖述聖及子上子高子順並已行事名曰孔叢子又撰小爾雅一卷行於世經餘必讀五卷中周書泰誓篇叙及尙友錄十三卷內俱載鮒有藏書功績明王船山讀通鑑亦嘗稱爲聖人之徒後自嵩山遷陳卒老於陳

武臣陳人陳勝旣起兵令臣徇趙臣自號武信君下趙數十城至邯鄲自立爲趙王

尋遣李良略太原良惑秦間反趙襲邯鄲臣遂爲邯鄲人所殺

史記

周文陳人嘗爲項燕軍視日事春申君自言習兵陳勝與之將軍印西擊秦爲章邯

所敗自刎死

史記

漢

應曜陳人隱居有盛名高帝時嘗與四皓俱徵曜獨不至天下爲之語曰商山四皓不如淮陽一老

鄭當時字莊其先鄭君嘗爲項籍將籍死已而屬漢高祖令諸故項籍臣名籍鄭君獨不奉詔詔盡拜名籍者爲大夫而逐鄭君鄭君死孝文時莊以任俠自喜脫張羽於虜聲聞梁楚間孝景時爲太子舍人每五日洗沐常置驛馬存諸故人請謝賓客夜以繼日常恐不徧莊好黃老言慕長者如恐不見年少官薄然其游知交皆其大父行天下有名之士也武帝立莊稍遷爲魯中尉濟南太守江都相至九卿爲右內史以武安侯魏其事貶秩爲詹事遷爲大農令莊爲太史誠門下客至無貴賤無留門者執賓主之禮以其貴下人每朝候上之間說未嘗不言天下之長者其推轂士及官屬丞史誠有味其言之也嘗引以爲賢於己未嘗名吏與官屬言若恐傷之聞人之善進言上唯恐後山東士諸公以此翕然稱莊奉使視決河自請治行五日上曰吾聞鄭莊行千里不齎糧請治行者何也莊在朝常趨和承意不敢甚引當否及晚節坐其任人賓客爲大農儻人多逋負陷罪贖爲庶人

頃之守長史上以爲老以莊爲汝南太守數歲以官卒莊始列九卿廉內行修絜中廢家貧賓客益落及居郡卒後家無餘貲財莊兄弟子孫以莊故至二千石六人焉見史記後入祀鄉賢

朱鮪莽末兵起鮪從更始拜大司馬後與河南太守武勃共守洛陽光武將北兵狗燕趙以寇恂爲河內太守拜馮異爲孟津將軍統三郡軍河上與恂合勢以拒鮪等異乃遣李軼書勸之降軼報異書異見其信效具以奏聞光武故宣露異書令鮪知之鮪怒使人刺殺軼由是城中乖離多有降者光武卽位遣大司馬吳漢等圍洛陽鮪堅守不下帝以岑彭常爲鮪校尉令往說之鮪曰大司徒被害時鮪與其謀又諫更始無遣蕭王北伐自知罪深彭具言于帝帝曰夫建大事者不忌小怨鮪今若降官爵可保况誅罰乎河水在此吾不食言彭復往告鮪卽面縛詣河陽帝卽解其縛令彭夜送鮪歸明且悉其衆出降封扶溝侯後爲少府傳襲累代

後漢書各傳節文

薛漢字公子世習韓詩父子以章句著名漢少傳父業尤善說災異讖緯教授常數百人建武初爲博士受詔校定圖讖當時言詩者推漢爲長永平中爲千乘太守



政有異迹後坐楚事辭連下獄死弟子犍爲杜撫會稽澹臺敬伯鉅鹿韓伯高最

知名

後漢書  
儒林傳

汝郁字叔異性仁孝年五歲母病不能食郁常抱持啼哭亦不食母憐之強爲飯宗

親共異之因字曰異及親歿遂隱處山澤賈逵薦於和帝帝即徵之甚見優禮後

累選爲魯相以德教化百姓流人歸者八九千戶

後漢書  
賈逵傳

魏昭字德公童時太原郭泰止陳昭知其有異求入其房供給洒掃泰曰年少當精

義書曷爲來近我乎昭曰蓋聞經師易遇人師難遭故欲以素絲之質附近朱藍

爾泰美其言聽與共止嘗不佳夜命昭作粥粥成進泰泰一啜怒呵之曰爲長者

作粥而不加敬使沙不可食耶以杯擲地昭更爲粥重進泰復呵之如此者三昭

容色無變意殊悅泰曰吾始見子之而今乃見子之心遂與友善卒爲妙士

漢紀參  
通鑑

張季禮遠赴師喪行至汝南界中遇寒冰車毀頓滯道路穎陰劉翊子相見而謂之

曰君慎終赴義行宜速達卽下車與之不告姓名策馬去季禮義其子相也後故

道穎陰還所假乘端閉門辭行不與相見云

後漢書  
劉翊傳

以上三人均  
入祀鄉賢

郤巡字仲信和帝時南陽樊英習京氏易兼明五經善風角算河洛七緯推步災異

隱於壺山之陽受業者踵至巡傳其業仕爲郡博士會魏朗亡命從受春秋圖緯  
官至侍中

三國吳

陳融與陳留濮陽逸沛郡蔣纂廣陵梁迪皆單貧有志時吳丞相陸遜弟瑁字子璋

少好學篤義融等因就與之游處瑁亦割少分甘與同豐約焉

三國志  
陸瑁傳

鄭泉字文淵博學有奇志性嗜酒嘗曰願得美酒滿五百斛船以四時甘脆置兩頭  
反覆沒飲之備卽往而啖肴饌酒有斗升減隨卽益之不亦快乎孫權以爲郎中  
泉後臨卒謂同類曰必葬我陶家之側庶百歲後化而成土幸見取爲酒壺實獲  
我心

晉

鄧遐字應遠勇力絕人氣蓋當時時人方之樊噲歷冠軍將軍數郡太守號爲名將  
襄陽城北沔水中有蛟常爲人害遐拔劍入水蛟繞其足遐揮劍截蛟數段而出  
枋頭之役免官尋卒寧康中追贈廬陵太守

王瑚字處仲少重武節成都王穎舉兵向洛以爲冠軍參軍積功累遷游擊將軍與

司隸滿奮河南尹周馥等俱屯大司馬門以衛宮掖時上官已縱暴珣與奮等共

謀除之反爲所害

晉書王隱傳

王隱字處叔世寒素父銓歷陽令少好學有著述之志每私錄晉事及功臣行狀未就而卒隱以儒素自守不交勢援博學多聞受父遺業西都舊事多所諳究建興中過江丞相軍諮祭酒涿郡祖納雅相知重納好博奕每諫止之納曰聊用忘憂耳隱曰蓋古人遭時則以功達其道不遇則以言達其才故否泰不窮也當今晉未有書天下大亂舊事蕩滅非凡才所能立君少長五都游宦四方華夷成敗皆在耳目何不述而裁之應仲遠作風俗通崔子真作政論蔡伯喈作勸學篇史游作急就章猶行於世便爲沒而不朽當其同時人豈少哉而了無聞皆由無所述作也故君子疾沒世而無聞易稱自彊不息况國史明乎得失之跡何必博奕而後忘憂哉納喟然歎曰非不悅子之道力不足也乃上疏薦隱元帝以草創務殷未遑史官遂寢不報太興初典章稍備乃召隱及郭璞俱爲著作郎令撰晉史豫平王敦功賜爵平陵鄉侯時著作郎虞預私撰晉書而生長東南不知中朝事數訪於隱并借隱所著書竊宋作盜寫之所聞漸廣是後更疾隱形於言色預既豪族

交結權貴共為朋黨以斥隱竟以謗免黜歸于家貧無資用書遂不就乃依征西將軍庾亮于武昌供其紙筆書乃得成詣闕上之隱雖好著述而文辭鄙拙蕪舛不倫其書次第可觀者皆其父所撰文體混漫義不可解者隱之作也年七十餘

卒于家

晉書

周翼字子鄉祖奕上谷太守父優車騎咨議翼幼孤依舅高平鄉鑿值永嘉喪亂饑饉相望鄉人以鑿名德傳共飭之時兄子邁及翼並小嘗攜之就食因並得存後同過江翼為剡縣令鑿之薨也翼追撫育之恩解職而歸席苦心喪三年歷青州

刺史少府卿六十四卒

晉書以上二人均祀鄉賢

北魏

袁翻字景翔項縣人

時淮陽更名項

父宣有才華為劉彧青州刺史沈文秀府主簿皇興中

東陽州平隨文秀入國而大將軍劉昶每提引之翻少以才學擅美一時初為奉朝請景明初李彪在東觀翻為徐紇所薦引兼著作佐郎以參史事及紇被徙尋解後遷司徒祭酒揚烈將軍尚書殿中郎正始初詔尚書門下於金鏞中書外省考論律令翻與門下錄事常景孫紹等入預其事後除豫州中正嘗議明堂辟雍



又議選邊戎事遭母憂去職熙平初除冠軍將軍廷尉少卿尋加征虜將軍後出爲平陽太守翻爲廷尉頗有不平之論及之郡甚不自得遂作思歸賦神龜末遷冠軍將軍涼州刺史時蠕蠕主阿那瓌後主婆羅門並以國亂來降朝廷問翻安置之所翻表論得失朝議是之還拜吏部郎中加平南將軍光祿大夫以本將軍出爲齊州刺史孝昌中除安南將軍中書令領給事黃門侍郎與徐紇俱在門下並掌文翰翻旣才學名重又善附會亦爲靈太后所信待是時蠻賊充斥六軍將親討之翻乃上表諫止後蕭寶夤大敗於關西翻上表請爲西軍死亡將士舉哀存而還者并加振賚後拜度支尙書尋轉都官時天下多事翻雖外請閑秩而內有求進之心識者恠之加撫軍將軍肅宗靈太后曾燕於華林園舉觴謂羣臣曰袁尙書朕之杜預欲以此杯敬屬元凱侍座者莫不羨仰翻名位俱重當時賢達咸推與之然獨善其身無所獎拔排抑後進懼其凌已建義初遇害於河陰年五十三所著文集百餘篇行於世贈使持節侍中車騎將軍儀同三司青州刺史嫡子寶首武定中司徒記室參軍弟躍

躍字景騰翻之弟博學儒才性不矯俗篤於交友翻每謂人曰躍可謂我家千里

駒也釋褐司空行參軍歷位尙書都兵郎中加員外散騎常侍將立明堂躍乃上議當時稱爲博洽蠕蠕主阿那瓌亡破來奔朝廷矜之送復其國旣而每使朝貢辭旨頗不盡禮躍爲朝臣書與瓌陳以禍福言辭甚美後遷車騎將軍太傅清河王懌文學雅爲懌所愛賞懌之文表多出於躍卒贈冠軍將軍吏部郎中所制文集行於世無子兄翻以子聿修繼

聿修字叔德七歲遭喪居處禮若成人九歲州辟主簿性深沉有鑑識清靜寡欲與物無競姨夫尙書崔休深所知賞年十八領本州中正兼尙書度支郎十年未嘗受升酒之遺邢邵常呼以清郎嘗候李僧伽先滅僕從然後入門曰見此賢令吾羞對軒冕齊受禪除太子庶子以本官行博陵太守天統中遷信州刺史爲政清靜不言而化自長史而下爰逮鰥寡孤幼皆得其歡心及還都百姓追列滿道涕泣送之州人鄭播宗等七百餘人詣闕請爲立碑斂縑布數百匹託中書侍郎李德林爲文以紀功德勅許之子知禮爲隋太子舍人

唐

袁楚客初魏元忠相武后有清正名至神龍中自端州召還再輔政天下傾望冀幹

正王室而稍憚權倖不能賞善罰惡譽望大減時楚客爲酸棗尉以書規之指陳  
十失元忠得書益慚開元二年玄宗置左右教坊選樂工數百人自教法曲於梨  
園又教宮女時習之又選妓女置宜春院給賜其家楚客上疏以爲上春秋鼎盛  
宜從經術邇端士尙朴素深以悅鄭聲好遊獵爲戒上嘉賞之與梁昇卿並以直

言極諫科及第

新唐書後  
入祀鄉賢

袁滋字德深憲之後爲華州刺史政清簡流民至者給地居之名其里曰義合以慈  
惠爲本民愛向之滋行者老遮道不得去代者楊子陵諭曰吾不敢易袁公政人  
皆羅拜後累封淮陽郡公

李肅字行中以功封田王建中時天子幸奉天叛將牛氏閉關據閩天子賜肅弓矢  
命之曰閩粵弗庭汝實征之肅率精銳數萬至臨汀浮流猝與賊遇兵不繼力戰  
而死屍浮水上彌月不變鄉民詹糾憫肅忠勇殮而祀之有禱輒應貞元十五年  
有司以聞勅封孚佑廣烈王以妃陳氏配享今廟在永安縣曰唐田王廟

忠烈  
祠

廷平府  
志後入

殷侑幼有志於學不治貨產長通經術以講道爲娛貞元末及五經第其學長於禮

擢太常博士元和八年回身請和親朝廷以仰費廣劇欲紓以期詔侑宗正少卿李孝誠使回鶻可汗驕甚盛陳甲兵欲臣使者侑不爲屈已傳命虜責其倨宣言欲留不遣衆色怖侑徐曰可汗唐堵欲坐屈使者拜乃可汗無禮非使臣倨也虜憚其言不敢逼還遷虛部員外郎干承宗叛遣侑招諭承宗聽命進諫議大夫侑論朝廷治亂得失前後凡八十四通以語切出爲桂管觀察使寶歷元年徙江西所至以潔廉稱入爲衛尉卿文宗卽位李同捷叛而廷湊陰爲脣齒兵久不解詔五品以上官議尙書省帝銳欲討賊羣臣無敢異論者獨侑請舍廷湊而專事同捷且言願以宗社安危爲計善帥攻心爲武含垢安人爲遠圖網漏吞舟爲至誠帝不納然內嘉尙同捷平以侑嘗爲滄州行軍司馬遂拜義昌軍節度使於時夷荒之餘骸骨蔽野墟里生荆棘侑單身之官安足蠹淡與下共勞苦以仁惠爲治歲中流戶襁屬而還遂爲營田丐耕牛三萬詔度支賜帛四萬匹佐其市初州兵三萬仰稟度支侑始至一歲自以賦入贍其半二歲則周用乃奏罷度支所賜戶口滋饒廩儲盈腐上下便安請立石紀政以勞加檢校吏部尙書六年徙天平節度自李師道亂朝廷雖析三鎮然務安反側賦入盡爲軍貲無輸王府者侑以餉



軍有贏當上送官乃裁制經費歲以錢十五萬緡粟五萬石歸有司加檢校尙書右僕射御史大夫溫造劾侑違制擅賦歛民爲無名之獻詔以庾承宣代還會濮州掾崔元武受吏賂又率屬邑奉錢增私馬估售官壘三罪計絹百二十匹大理以入私馬一重削三官刑部覆訊當流未決侑奏三犯不同坐所重律頻贓者累論元武犯皆枉法當死詔用覆訊流元武賀州帝嘉侑守法進刑部尙書以造所奏不直復用爲天平節度開成元年再召爲刑部尙書時李訓鄭注已誅帝問侑治安術侑言朝廷宜任耆德毋輕用新進帝善之賜綵三百匹初鹽鐵度支使屬官悉得以罪人繫在所獄或私置牢院而州縣不聞知歲千百數不時決侑奏許州縣糾列所繫申本道觀察使并具獄上聞許之賜黃金十斤以酬直言涇原節度使朱叔夜坐侵牟士卒贓數萬家畜兵器罷爲左武衛大將軍侑薄其罪天子由是疏之賜叔夜死出侑爲山南東道節度使坐減兵不先論啓左遷太子賓客分司東都俄領忠武節度卒年七十二贈司空侑以經術進臨事銳敏有彊直名晚節內冀台輔稍務交結而素望少衰云孫盈孫

盈孫廣明初爲成都諸曹參軍僖宗至蜀聞有禮學擢太常博士光啓三年帝將